

Aidilfitri meriah

BH 26/10/2006

Banjir di utara Semenanjung tak halang umat Islam rai lebaran

KUALA LUMPUR: Umat Islam di seluruh negara menyambut Aidilfitri, kelmarin dan semalam, dalam suasana meriah dengan mengadakan solat Aidilfitri diikuti tradisi rumah terbuka yang turut diserikan rakyat berbilang kaum.

Malah, banjir yang melanda beberapa negeri di Utara Semenanjung berikutan hujan sejak beberapa hari lalu, tidak menghalang umat Islam menunaikan solat sunat di pagi lebaran di kawasan masing-masing dan mengamalkan kunjung-mengunjung dan bermaaf-maafan.

Yang di-Pertuan Agong Tuanku Syed Sirajuddin Syed Putra Jamalullail dan Permaisuri Agong uanku Fauziah Tengku Abdul Rashid menghadiri majlis menghadap dan santapan pagi bersama pemimpin negara yang diketuai Perdana Menteri, Datuk Seri Abdullah Ahmad Badawi di Istana Negara, kelmarin.

Hadir sama, Timbalan Perdana Menteri, Datuk Seri Najib Razak dan menteri Kabinet beragama Islam.

Selepas itu, Yang di-Pertuan Agong dan Permaisuri Agong dengan diiringi Perdana Menteri serta menteri Kabinet beragama Islam ke Masjid Negara untuk menunaikan solat Aidilfitri bersama rakyat.

Majlis istana terbuka diadakan mulai jam 10 pagi untuk orang kenamaan termasuk duta asing diadakan, disusuli rumah terbuka untuk rakyat mulai jam 11 pagi.

Abdullah dan Najib kemudian menyertai menteri Kabinet beragama Islam, mengadakan rumah terbuka di Pusat Dagangan Dunia Putra (PWTC) yang dikunjungi kira-kira 200,000.

Perdana Menteri juga akan mengadakan rumah terbukanya di Dewan Milenium, Kepala Batas, mulai jam 9 pagi hingga 1 tengah hari ini.

Di Kedah ketibaan 1 Syawal kelmarin disambut sederhana dengan umat Islam di beberapa daerah terpaksa menyambut Aidilfitri dalam suasana banjir dengan ratusan penduduk masih berada di pusat pemindahan.

Cuaca cerah di negeri itu pada sebelah pagi membolehkan amalan kunjung-mengunjung, namun di kawasan yang dilanda banjir seperti Kubang Pasu, Pendang dan Kota Star, kebanyakan umat Islam hanya menunggu kehadiran tetamu.

Begitu juga di Perak apabila hujan lebat melanda pada sebelah petang hingga menyebabkan beberapa kawasan dinaiki air secara mendadak termasuk di bandar raya Ipoh.

Suasana mendung di Kota Bharu sejak pagi tidak menjejaskan kemeriahan Aidilfitri dengan umat Islam menunaikan solat sunat serta mengadakan rumah terbuka.

Kejadian ribut yang merosakkan beberapa rumah di Rembau, Negeri Sembilan, juga tidak menjadi penghalang bagi mereka menyambut 1 Syawal dalam suasana sederhana.

Begitu juga di Sarawak, cuaca cerah yang bebas jerebu turut memeriahkan Aidilfitri di negeri itu.

Sementara itu, di semua negeri, Sultan, Yang Dipertua Negeri, Menteri Besar dan Ketua Menteri turut mengadakan rumah terbuka masing-masing.